



Komisija za očuvanje nacionalnih spomenika na osnovu člana V stav 4. Aneksa 8. Općeg okvirnog sporazuma za mir u Bosni i Hercegovini i člana 39. stav 1. Poslovnika o radu Komisije za očuvanje nacionalnih spomenika, na sjednici održanoj od 6. do 10. jula 2004. godine donijela je

O D L U K U

I.

Mjesto i ostaci graditeljske cjeline Aladža (Hasan Nazirove) džamije u Foči proglašavaju se nacionalnim spomenikom Bosne i Hercegovine (u daljnjem tekstu: nacionalni spomenik).

Nacionalni spomenik čine džamija Aladža sa pripadajućim objektima: turbe Ibrahima, sina osnivača džamije, nadgrobni sarkofag osnivača Hasana Nazira, šadrvan, stariji grobni sarkofazi, harem sa nišanima, kameni zidovi ograde, dvije kapije i česma u zidu dvorišta.

Nacionalni spomenik nalazi se na lokaciji koja obuhvata k.č. broj 1915, posjedovni list br. 1426, k.o. Foča, Općina Foča, Republika Srpska, Bosna i Hercegovina.

Na nacionalni spomenik primjenjuju se mjere zaštite i rehabilitacije utvrđene Zakonom o provođenju odluka Komisije za zaštitu nacionalnih spomenika uspostavljene prema Aneksu 8. Općeg okvirnog sporazuma za mir u Bosni i Hercegovini ("Službeni glasnik Republike Srpske" br. 9/02).

II.

Vlada Republike Srpske dužna je osigurati pravne, naučne, tehničke, administrativne i finansijske mjere za zaštitu, konzervaciju, prezentaciju i rehabilitaciju nacionalnog spomenika.

Vlada Republike Srpske dužna je osigurati sredstva za izradu i provođenje potrebne tehničke dokumentacije za rehabilitaciju nacionalnog spomenika.

Komisija za očuvanje nacionalnih spomenika (u daljnjem tekstu: Komisija) utvrdit će tehničke uvjete i osigurati finansijska sredstva za izradu i postavljanje informacijske ploče sa osnovnim podacima o spomeniku i odluci o proglašenju dobra nacionalnim spomenikom.

III.

Utvrđuju se hitne mjere zaštite nacionalnog spomenika:

- izvršiti privremeno ograđivanje parcele nacionalnog spomenika čvrstom metalnom ili drvenom panelnom zaštitnom ogradom visine oko 2 metra;
- izvršiti otkopavanje fragmenata nacionalnog spomenika na lokacijama na koje su odvezeni nakon rušenja džamije, njihovo snimanje, sortiranje i rekognosciranje;
- osigurati adekvatan način zaštite fragmenata do trenutka ugradnje u rekonstruirani objekt.

S ciljem trajne zaštite nacionalnog spomenika, utvrđuje se sljedeće:

I zona zaštite se primjenjuje na prostoru definiranom u tački I stav 3. ove odluke. U toj zoni se provode sljedeće mjere zaštite:

- nacionalni spomenik bit će rehabilitiran na izvornoj lokaciji, u izvornom obliku, u izvornim dimenzijama i sa identičnim dekorativnim elementima, uz primjenu izvornih ili istovrsnih materijala i izvornih metoda građenja, a na osnovu dokumentacije o prijašnjem izgledu;

- izvršiti sanaciju i konsolidaciju preostalih dijelova temelja i zidova;
- svi ulomci džamije pronađeni na lokaciji i na drugom mjestu na koje su odvezeni nakon rušenja objekta bit će sabrani, registrirani, snimljeni i ponovno ugrađeni u rekonstruirani objekt metodom anastiloze;
- ulomke koji se zbog visokog stepena oštećenja ne mogu ugraditi na odgovarajući način konzervirati i prezentirati u sklopu graditeljske cjeline;
- sav izvorni građevinski materijal ugraditi u nacionalni spomenik pri njegovoj rekonstrukciji;
- dijelove koji nedostaju rekonstruirati na osnovu dokumentacije o izvornom stanju od materijala koji su istovrsni ili slični izvornim.

II zona zaštite primjenjuje se u dijelu harema Aladža džamije koji je sada gradski park i koji je označen kao k.č. br. 1916 k.o. Foča. U toj zoni se utvrđuju sljedeće mjere zaštite:

- na parceli harema Aladža džamije koja je pretvorena u gradski park, sjeverno od nacionalnog spomenika nije dopuštena izgradnja objekata, niti sječa stabala u parku;
- dopušteni su tekuće održavanje parkovskog mobilijara i staza i hortikulturno uređenje parkovskih zasada i ukrasnog grmlja, te konzervacija i prezentacija nišana u parku.

III zona zaštite primjenjuje se na parceli između Ulice A. Fetahagića i rijeke Čehotine, u potezu 75 metara sjeverozapadno od lokacije nacionalnog spomenika pa do 50 metara južno-jugoistočno od lokacije nacionalnog spomenika. U toj zoni se utvrđuju sljedeće mjere zaštite:

- nije dopuštena izgradnja novih objekata, niti promjena namjene postojećim objektima ukoliko ta promjena ugrožava sakralno i kulturno značenje nacionalnog spomenika. Postojeći objekti treba da zadrže postojeće vertikalne i horizontalne gabarite i arhitektonske oblike, a dopuštaju se radovi na njihovom tekućem održavanju.

IV zona zaštite primjenjuje se na prostoru južno i istočno od lokacije nacionalnog spomenika. U toj zoni se utvrđuju sljedeće mjere zaštite:

- dopušta se rehabilitacija ratom srušenih objekata i interpolacija novih objekata do spratnosti P+1 uz upotrebu četverovodnih krovova i tradicionalnih materijala: cigle, crijepa, ćerpiča, drveta, malterisanih fasada, uz stručno mišljenje nadležne službe zaštite naslijeđa na nivou Republike Srpske;
- očistiti smetlište u Ulici O. Đikića i zabraniti odlaganje smeća, kabastog otpada u kontaktnoj zoni nacionalnog spomenika.

Situaciona karta sa ucrtanim granicama obuhvata navedenih zona zaštite je sastavni dio ove odluke.

IV.

Stavljaju se izvan snage svi provedbeni i razvojni prostorno-planski akti koji su u suprotnosti sa odredbama ove odluke.

V.

Svako a posebno nadležni organi Republike Srpske, gradske i općinske službe suzdržat će se od preduzimanja bilo kakvih postupaka koji mogu oštetiti nacionalni spomenik ili dovesti u pitanje njegovu zaštitu i rehabilitaciju.

VI.

Ova odluka dostavit će se Vladi Republike Srpske, ministarstvu nadležnom za prostorno uređenje u Republici Srpskoj, nadležnoj službi zaštite naslijeđa na nivou Republike Srpske, općinskom organu uprave nadležnom za poslove urbanizma i katastra radi

provođenja mjera utvrđenih u tač. II – V ove odluke i nadležnom općinskom sudu radi upisa u zemljišne knjige.

VII.

Sastavni dio ove odluke je obrazloženje sa pratećom dokumentacijom koje je dostupno na uvid zainteresiranim licima u prostorijama i na web-stranici Komisije (<http://www.aneks8komisija.com.ba>).

VIII.

Danom donošenja ove odluke sa Privremene liste nacionalnih spomenika Bosne i Hercegovine («Službeni glasnik BiH» broj 33/02, «Službeni glasnik Republike Srpske» broj 79/02, «Službene novine Federacije BiH» broj 59/02 i «Službeni glasnik Brčko Distrikta BiH» broj 4/03) se briše nacionalni spomenik upisan pod rednim brojem 211.

IX.

Prema članu V stav 4. Aneksa 8. Općeg okvirnog sporazuma za mir u Bosni i Hercegovini, odluke Komisije su konačne.

X.

Ova odluka stupa na snagu danom donošenja i objavit će se u «Službenom glasniku BiH».

Ovu odluku Komisija je donijela u sljedećem sastavu: Zeynep Ahunbay, Amra Hadžimuhamedović, Dubravko Lovrenović, Ljiljana Ševo i Tina Wik.

Broj: 06.1-02-1062/03-6
6. jula 2004. godine
Sarajevo

Predsjedavajući Komisije

Dubravko Lovrenović